

## Uunga

## Allannguutissatut siunnersuut

**Radiukkut tv-kullu aallakaatitsisarneq pillugu Inatsisartut inatsisissaattut siunnersuut**

Aappassaaneerneqarnissaanut Naalackersuisunit saqqummiunneqartoq.

## § 31-mut

1. § 31, *imm. 1-3*, imatut oqaasertaqassaaq:

”§ 31. KNR siulersuisunit tallimanik ilaasortalimmit aqunneqassaaq, taakkunanga siulersuisut siulittaasuat ilaasortarlu ataaseq Naalackersuisunit toqqarneqartarlutik. Ilaasortat allat pingasut ukunanga innersuussisoqarneratigut Naalackersuisunit toqqarneqartarput:

- 1) Ilisimatusarfik, ilaasortassamik ataatsimik Kalaallit Nunaanni tusagassiornermut tunngatillugu tusagassiornermik annertuumik piginnaasalimmik innersuussisartoq.
- 2) Kalaallit Nunaanni eqqumiitsuliortut kulturimillu ingerlatsisut nuna tamakkerlugu kattuffiat ilaasortassamik ataatsimik eqqumiitsuliornermik kulturimillu annertuumik assigiinngiaartunillu ilisimasaqartumik innersuussisartoq.
- 3) Ilaasortaq ataaseq KNR-imi aalajangersimasumik atorfillit inassuteqarnerisigut.

*Imm. 2.* Ilaasortat 18-inik ukioqalereersimassapput, aammalu Inatsisartunut, Folketingimut kommunalbestyrelsinulluunniit ilaasortaassanatik taakkunungaluunniit qinigassanngortittuussaanatik. KNR-imi atorfillit siulersuisunut toqqarneqarsinnaanngillat, *imm. 1*, nr. 3 malillugu inassuteqaataasimangikkunik.

*Imm. 3.* Siulersuisut tamarmiullutik tusagassiorneq, kultureqarneq, pisortatut aqutsineq inuussutissarsiornerlu paasisimasaqarfigissavaat. Ilaasortaq KNR-imi aalajangersimasumik sulisut innersuussinerisigut toqqarneqartoq pinnagu, ilaasortat ataasiakkaat pisortatut aqutsineramik inuussutissarsiornermillu ilisimasaqassapput aammalu uppernarsarneqarsinnaasumik suliamik ingerlatsinermi piginnaasaqassallutik aammalu naleqquttumik ilinniagaqarsimassallutik, siulersuisuni pisortaqatigiinniluunniit taakkununnga assingusuni peqataanikuunermikkut misilittagaqassallutik. Tamassuma saniatigut ilaasortat inassuteqaateqartoqartinnagit toqqarneqartut aappaa aningaasaqarnermik ilisimasaqassaaq aappaalu sulisut pillugit suliasanik ilisimasaqassalluni.”

## § 33-mut

2. § 33, *Imm. 2*, imatut oqaasertaqassaaq:

”*Imm. 2.* Atuisut siunnersuisoqatigiiffianni qulingiluanik ilaasortaqartumi ilaasortat ukuninnga innersuussisoqarneratigut Naalackersuisunit toqqarneqartassapput:

- 1) Meeqqat illersuisuat, ilaasortassamik ataatsimik innersuussisartoq.
- 2) Oqaasileriffik, ilaasortassamik ataatsimik innersuussisartoq.
- 3) Kalaallit Nunaanni eqqumiitsuliortut kulturimillu ingerlatsisut nuna tamakkerlugu kattuffiat ilaasortassamik ataatsimik innersuussisartoq.
- 4) Innarluutillit nuna tamakkerlugu kattuffiat ilaasortassamik ataatsimik innersuussisartoq.
- 5) Kalaallit Nunaanni tusarnaartartut isiginnaartartullu nuna tamakkerlugu kattuffiat ilaasortassamik ataatsimik innersuussisartoq.
- 6) Radioqarfiit tv-qarfiillu nuna tamakkerlugu kattuffiat ilaasortassamik ataatsimik innersuussisartoq.
- 7) Ilisimatusarfik ilaasortassamik ataatsimik innersuussisartoq.
- 8) Nunaqarfiit Nuna Tamakkerlugu Peqatigiiffiat ilaasortassamik ataatsimik innersuussisartoq.
- 9) Kalaallit Nunaanni Utoqqaat Peqatigiiffiat ilaasortassamik ataatsimik innersuussisartoq.”

Inatsisissatut siunnersuummut oqaaseqaatit

### **Oqaaseqaatit nalinginnaasut**

Inatsisartut Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaata Naalakkersuisumik apersuineranni oqaloqatigiinnerit aammalu siunnersuutip aappassaaneerneqarnissaanut Ataatsimiititaliap isumaliutissiissutaani allaqqasut tunngavigalugit allannguutissatut siunnersuut saqqummiunneqarpoq.

Allannguutissatut siunnersuut kinguneqarpoq siulersuisuni ikinnerussuteqartut inassuteqaateqartoqartinnagu Naalakkersuisunit maannakkut toqqarneqartassasut, tassa siunnersuutigineqarmat siulersuisunut ilaasortanit tallimaasunit pingasut inassuteqaateqartoqareerneratigut toqqarneqartassasut. Aammattaaq oqaatigineqassaaq Atuisut Siunnersuisoqatigiivinit innersuussisinnaatitaanermut allannguutit Ataatsimiititaliap sulineranit aallaaveqartut.

Siulersuisunut ilaasortat allannguutissatut siunnersuummi allanngunngillat, taamaammat allannguutit aningaasatigut allaffissornikkullu kinguneqarnissaat ilimagineqanngilaq. Ilimagineqarsinnaavorli Atuisut Siunnersuisoqatigiivini ilaasortat marlunnik ilaneqarnerisa kinguneranik ilaatigut aningaasartuuteqartoqassasoq. Aningaasartuut angalanermi aningaasartuutaassapput, taakkulu annikingaatsiarnissaat ilimagineqarpoq.

**Inatsisissatut siunnersuummi aalajangersakkanut ataasiakkaanut oqaaseqaatit**

*Nr. 1-imut*

Aalajangersakkami allaqqavoq KNR-ip siulersuisuini ilaasortanik tallimanik Naalackersuisut qanoq toqqaasarnersut, tassunga ilanngullugit kattuffinnut innersuussisinnaatitaasunut, piginnaasanik piumasqaatinut tamanut tunngasunut aammalu piginnaasanut piumasqaatinut immikkut ittunut siulersuisuni ilaasortat pineqartut qanoq toqqarneqartarnissaannut tunngavinnut tunngatillugu.

Imm. 1 maannakkut normulersorlugu aalajangersakkatut allaqqalerpoq, tassani innersuussisinnaatitaasut allaqqasoq, taakkunangga nr. 1 aamma nr. 2 nutaaliernerullutik, nr. 3-lu siunnersuutaqqaartumi aalajangersimasumik sulisut innersuussisinnaatitaanerit pillugu § 31, imm. 1, naggatit aappaanit ingerlatitseqqiinerulluni. Aammattaaq nr. 1-imi 2-milu innersuussinermi piginnaasassat ilaapput. Nr. 1-imut tunngatillugu tamanna kinguneqarpoq ilaasorta tusagassiornermik suliaqarnermi immikkut piginnaasaqarnermik takutitsissasoq, tamannalu ilinniagaqarnikkut inuussutissarsiutinilu misilittagaqarnikkut pissarsiarineqarsinnaavoq. Tamassuma saniatigut oqaatigineqassaaq toqqaanermi soqutigisanik aallussinnginnissamut piumasqaatit nalinginnaasut isiginiarneqassasut.

Imm. 1, nr. 1-imut tunngatillugu oqaatigineqassaaq Ilisimatusarfik Tusagassiortunngorniarfimmu taarsiullugu allaqqasoq, tamassumunngalu pissutaavoq kingullertut taaneqartoq ilinniarfiunngimmat nammineertoq, Ilisimatusarfiulli ataani immikkoortortaalluni. Kisiannili Tusagassiortunngorniarfiup Ilisimatusarfiup ataani inissisimanagera taamaallaat pissutigalugu Ilisimatusarfik innersuussisinnaatitaavoq. Tamassuma kinguneraa ilinniarfik ilinniarfiit allat ataanni siunissami inissinneqassappat innersuussisinnaatitaaneq taamatulli nuunneqarumaarpoq. Taamaalilluni innersuussisinnaatitaanermut tunngavilersuutigineqarpoq Tusagassiortunngorniarfiup immikkut ilisimasaqarnera suliamillu ingerlatsinermi piginnaasat tusagassiuutinut tusagassiortarnermilu pissutsinut tunngatillugu piginnaasaqartutut ilimagineqarnera.

Imm. 1, nr. 2 eqqarsaatigalugu oqaatigineqassaaq Kalaallit Nunaanni eqqumiitsuliortut kulturimillu ingerlatsisut nuna tamakkerlugu kattuffii arlaliuppata kattuffik amerlanerpaanik ilaasortalik innersuussisinnaatitaassasoq. Taamaalilluni Eqqumiitsuliornikkut Pinngorartitsisut Ingerlatsisullu (EPI) maannakkut innersuussisinnaatitaassapput.

Suliffeqarfimmi sulisut aallartitaqarnissaannik nr. 3-mi siunnersuutigineqartumi siunertaavoq qulliinerusumik suliniutinik aallartinneqartunik sulisullu naggataatigut piviusunngortitseqatigiiffisassaannik sulisut qaqugukulluunniit paasisaqartarnissaasa qulakkeerneqarnissaa.

Ilaasortat toqqarneqartut inersimasutut nammineersinnaalersimanissaat KNR-illu politikikkut sunnerneqartannginnissaata annertusarnissaa imm. 2-kkut qulakkeerneqassasoq, taamaalilluni suliffeqarfiup nakerisarsiunnginnera tatiginassusialu apeqquserneqarsinnaassanatik. Mianerinninnissaq taanna aallaavigalugu nutaatut erseqqissarneqarpoq politikikkut suliaasanut

taaneqartunut siulersuisunut toqqaasinnaanginnermut tunngatillugu pisortatigoortunik qinigassanngortinneq ilaasortaanermut naligiissinneqartoq.

Imm. 3, oqaaseqatigiit siullianni siunertaavoq tusagassiornermi, kultureqarnermi kiisalu aqutsinermi inuussutissarsiornermilu pissutsinik ilisimasaqartunik siulersuisut katitigaassasut, taamaalillunilu tusagassiornermik, kultureqarnermik inuussutissarsiornermillu ingerlatsinermi piumasaqaataasutut suliffeqarfiup aqunnissaanut pitsaanerpaanik piginnaasaqassallutik.

Tassunga peqatigitillugu oqaaseqatigiit aappaanni ersippoq ilaasortat tamarmik, ilaasortaq aalajangersimasumik sulisunit innersuussutigineqartoq pinnagu, immikkut tamarmik aqutsinermik inuussutissarsiornermillu ilisimasaqassasut. Inatsimmut atuuttumut sanilliullugu nutaalioneruvoq, tamassumalu kinguneraa ilaasortat Namminersorlutik Oqartussat iluanni siulersuisunut atuuttut assinganik piginnaasaqarnissamik piumasaqaatinik ilaasortat eqqortitsinissaannik siulersuisunut ilaasortaanissamut piumasaqaateqartoqarnera. Tamanna pivoq suliffeqarfiup qulliunerusumik aqunneqarnerata nukittorsarneqarnissaa siunertaralugu aammalu sapinngisamik piginnaasaqartunik iliuuseqarsinnaassuseqartunillu aqutsisoqartilerniarlugu. Sulisut inummik tatigisaminnik kiffaanngissuseqarlutik toqqaanissaat qulakkeerniarlugu siulersuisuni ilaasortaq KNR-imi aalajangersimasumik sulisunit toqqarneqartoq piginnaasassanik piumasaqaatit pillugit aalajangersakkami ilanngunneqanngilaq.

Imm. 3-mi oqaaseqatigiit kingulliat nutaavoq, aammalu innersuuteqartoqareerneratigut ilaasortanik toqqaanermut atatillugu piginnaasassanik Naalakkersuisut tunngavigisassaannik takutitsilluni. Aningaasaqarnermik piginnaasat KNR-imut aningaasaliissutinut annertuunut suliffeqarfimmillu ingerlatsinermi aningaasatigut atugassaritinneqartut annertunerpaamik anertusarnissaannik isiginiagaqarnissamut tunngavoq. Sulisut pillugit suliaqarnermik ilisimasaqarnissaq sulisut KNR-imut pingaarnertut isumalluutaanerannik tunngaveqarpoq, tamassumanilu assersuutigalugu sulisunik ineriartortitsinermik, sulisut suleriinnarnissaannik sulisussarsiornermilu suliniuteqarnermik minnerunngitsumillu ilinniaqinnissanik annertunerusumik isiginninniarnissaq piumasaqaataavoq. Ilaasortat taakku marluk tassunga peqatigitillugu piginnaasassatut piumasaqaatinik tamanut tunngasunik aalajangersakkami oqaaseqatigiit aappaanni allassimasunik eqqortitsissapput.

*nr. 2-mut*

Pisortat kattuffiillu Atuisut Siunnersuisoqatigiiffiannut ilasortassanik toqqagassanik inassuteqartartut aalajangersakkami allaqqapput. Immikkut ilisimasaqarnissamik ilimagineqartunik soqutigisaqartut pineqartut sinniisoqarnissaat siunertaralugu Atuisut Siunnersuisoqatigiiffiat katitigaavoq.

Allannguutissatut siunnersuutip kinguneraa Atuisut Siunnersuisoqatigiiffianni ilaasortat marlunnik ilaneqarnissaat, taamaalilluni Atuisut Siunnersuisoqatigiiffiat katillugit qulingiluanik ilaasortaqaassalluni. Taamaalilluni ersippoq Nunaqarfiit Nuna Tamakkerlugu Peqatigiiffiat aamma Utoqqaat Peqatigiiffiat kattuffiit taakku soqutigisaat aallaavigalugit KNR-imi siulersuisunut siunnersuisinnaanissat siunertaralugu Atuisut Siunnersuisoqatigiiffiannut ilaasortassamik ataatsimik aamma innersuussisinnaasut. Assersuutigalugu tassaasinnaapput, aallakaatitat innuttaasunut utoqqaanerusunut sammitinneqartut.

Ilimagineqarpoq soqutigisaqartut tamarmik aalajangersakkami taaneqartut suliassat §§ 20-27 naapertorlugit KNR-ip suliarinissaannik inatsit naapertorlugu pisussaaffiik immikkut ilisimasaqassasut soqutigisaqarlutillu. Assersuutigalugu § 20, imm. 7-imi ersippoq aallakaatitanik meeqqanut inuussuttunullu tunngasunik KNR neqerooruteqartassasoq, aammalu § 24-imi ersippoq kalaallit oqaasiisa piginnarnissaannut ineriartortinnissaannullu KNR tapersiissasoq. Aammattaaq § 20, imm. 6-imi ersippoq aallakaatitassanik neqeroorutini eqqumiitsuliorneq kulturilu pillugit assigiinngiiaartut takutinneqartassasut kiisalu Kalaallit Nunaanni inuiaqatigiinni kulturikkut soqutigisat assigiinngiiaassusiat malinneqassasoq. Aammattaaq § 20, imm. 8 naapertorlugu inuit innarluutillit aallakaatitassianik isiginnaarsinnaanissaat tusarnaarsinnaanissaallu KNR-ip annertusarniassagaa, KNR-ilu minnerpaamik aallakaatitassianik Kalaallit Nunaanni radioqarfiit tv-qarfiillu allat aallakkaatitassianik aallakaatitsisassasoq, tak. § 28, imm. 1, nr. 4.

Aalajangersakkami nr. 4-mut tunngatillugu oqaatigineqassaaq kattuffik taanna maannakkut tassaasoq Kalaallit Nunaanni Innarluutillit Piginnaanikitsut Kattuffiat.

Nuna tamakkerlugu kattuffiit amerlaneruppata kattuffik amerlanerpaanik ilaasortanik innersuussisinnaatitaassaaq. Tamanna nr. 9 eqqarsaatigalugu aamma atuuppoq, tamassumalu kinguneranik ilimagineqarpoq Kattuffik Utoqqaat Nipaataq ullumikkut innersuussisinnaatitaasoq.